



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FE-223, FA-V12	23/13

NY VURDERING AV SØKNAD OM TILSKOT TIL INNKJØP AV FLYGEL TIL VAKSDAL KYRKJE - VAKSDAL SOKNERÅD

Vedlagte saksdokument:

SØKNAD OM BYGDEUTVIKLINGSMIDLAR TIL NYTT FLYGEL I VAKSDAL KYRKJE

Tilleggopplysingar til søknad om bygdeutviklingsmidlar til innkjøp av orgel til Vaksdal kyrkje

Ad søknad om bygdeutviklingsmidlar

Om Vaksdal sokn og sokneråd

Kommunedirektøren sitt framlegg til vedtak:

ALTERNATIV 1:

Med bakgrunn i retningslinene for tildeling av midlar til bygdeutvikling, finn ikkje Bygdeutviklingsutvalet grunnlag for å løyve midlar til innkjøp av flygel til Vaksdal kyrkje.

Grunngjevinga for avslaget er at soknerådet som organisasjon, ikkje i tilstrekkeleg grad, ligg innanfor målgruppa for bygdeutviklingsmidlane, og at bruken av flygelet i hovudsak vil liggje på sida av kva type tiltak midlane skal vere med å fremje.

Søknaden frå Vaksdal sokneråd om kr. 15 000,- i tilskot, vert difor avsege.

ALTERNATIV 2:

Med bakgrunn i retningslinene for bygdeutviklingsmidlane, løyver Bygdeutviklingsutvalet kr. 15 000,- i bygdeutviklingsmidlar til Vaksdal sokneråd for innkjøp av flygel til bruk i Vaksdal kyrkje.

Bakgrunnen for løyvinga er at flygelet vil medverke til utvikling av musikk- og kulturlivet i bygda, og kome ålmenta til nytte.

Løyvinga utgjer 7 % av innkjøpskostnaden på kr. 216 000,-.

Tilskotet vert betalt ut etter innsending av betalingsoppmoding, med sluttrapport og kostnadsdokumentasjon.

Løyvinga gjeld i to år, fram til 01.06.2025. Tilskotet vert trekt attende etter dette.

Saksopplysningar:

Samandrag/konklusjon (kort om saka)

Vaksdal sokneråd søkte i søknad av 03.02.23, om kr. 15 000,- i bygdeutviklingsmidlar til innkjøp av flygel til Vaksdal kyrkje. Flygelet skal nyttast til tradisjonelle kyrkjelege aktivitetar, og ved ulike musikk- og kulturarrangement for ålmenta (konsertar m.m.).

Kommunedirektøren gjorde framlegg om avslag på søknaden til møtet i Bygdeutviklingsutvalet i mars 2023. Grunngevinga vart gjort med utgangspunkt i retningslinene for bygdeutviklingsmidlane. Argumentasjonen vart knytt til type organisasjon som søkjer er, og at tiltaket ikkje vart vurdert til å ha brei nok, ålmennyttig karakter.

Soknerådet sendte inn presiseringar om bruken/nyttan av flygelet etter innsendt søknad, med vekt på musikk- og kulturarrangement for ålmenta (konsertar, m.m.).

Brevet frå soknerådet vart lagt fram for Bygdeutviklingsutvalet på møtet den 07.03.23. På bakgrunn av dette, vart ikkje søknaden om midlar handsama, men sendt attende til administrasjonen for ny vurdering.

Kommunedirektøren har no utforma to, alternative framlegg til vedtak i saka, som grunnlag for handsaming på møtet i Bygdeutviklingsutvalet den 23.05. Eitt framlegg for, og eitt framlegg imot å gje tilskot.

Bakgrunn for saka

I søknad av 03.02.23, søkte Vaksdal sokneråd om kr. 15 000,- i bygdeutviklingsmidlar til innkjøp av flygel for bruk i Vaksdal kyrkje.

I samframstillinga til møte i Bygdeutviklingsutvalet den 07.03.23, innstilte Kommunedirektøren på å ikkje gje tilskot til tiltaket. Grunngevinga var at innkjøpet av flygel ligg på sida av intensjonen med bygdeutviklingsmidlane, både ut frå kven som står som søkjar og søknaden sin karakter, sjølv om grensegangen kan vere vanskeleg å trekkje, etter Kommunedirektøren si vurdering.

På bakgrunn av VP sin omtale av saksinnstillinga i førekant av handsaminga i Bygdeutviklingsutvalet, sendte soknerådet ei skriftleg presisering av søknaden, med vekt på soknerådet sitt frivillige arbeid og kva tyding det nye orgelet kan gje for kulturlivet i bygda.

Tilleggsinformasjonen frå soknerådet vart lagt fram for Bygdeutviklingsutvalet på møtet, som vedtok å sende søknaden attende til administrasjonen for ny handsaming.

I brevet frå soknerådet, er det spesielt lagt vekt på følgjande forhold:

- *«At mykje av arbeidet i soknet i realiteten er frivillig arbeid sjølv om det handlar om «Den norske kyrkje».*
- *At flygel ikkje er eit naturleg fast inventar i kyrkja. Som eit tillegg til kyrkjeorgelet vil flygelet bidra positivt både under kyrkjelege seremoniar, gudstenester og til kulturlivet i bygda. Vaksdal kyrkje var bygd i 1933 og har fram til no hatt piano, ikkje flygel.*
- *At soknet ikkje har eigne budsjettmidlar til innkjøp av flygel.*

- *Innkjøp av flygel til Vaksdal kyrkje er ei investering for framtida som vil kunne bidra til utvikling av mellom anna musikk og kulturliv».*

Kommunedirektøren viser elles til brevet frå soknerådet i sin heilskap, og til administrasjonen si opprinelege innstilling som opplysingar i saka, sjå vedlegg.

Formelt grunnlag:

- «Retningslinjer for tilskot til bygdeutvikling», vedtekne 2605.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Mykje av arbeidet i regi av soknerådet, er knytt til tradisjonell, kyrkjeleg og religiøs verksemd i samband med arrangement og trus-opplæring. Men kyrkja som samlingstad i bygda, har også breiare funksjon og bruk, i form av ulike, kulturelle og musikalske arrangement for ålmenta, der innkjøpt flygel inngår i bruken. Dette er tiltak som er innafør føremålet til bygdeutviklingsutvalet, gjennom å fremje engasjement, aktivitet og trivnad for ålmenta («alle»). Likevel vil den primære verksemda i kyrkja, med bruk av orgelet, vere knytt til arbeid/tilbod inn mot kyrkjelyden/menigheita, slik som Kommunedirektøren forstår saka.

Kommunedirektøren utdjupa ikkje saka ytterlegare, men viser til søknaden sitt innhald, og presiseringane frå soknerådet i etterkant.

Det kan vere vanskeleg å trekkje ei grense for kva som er innanfor føremålet med bygdeutviklingsmidlane, og ikkje, spesielt i gjeldande sak. Tilskotsbeløpet det vert søkt om, er ikkje stort, og det er lagt ned vesentleg, lokal innsats for å finansiere innkjøpet av flygelet. Men søknaden har likevel nokre moment og karaktertrekk med prinsipiell og premissgjevande verknad (presidens), som det vil vere viktig å ta stilling til ved ei handsaming.

Ut frå saka sin karakter, vel difor Kommunedirektøren å leggje fram ei delt innstilling, med to alternative framlegg til vedtak; eitt for og eitt imot å gje tilskot.